

Yut

Yut belen asan kayyin

¹Be, nebe Yems kulin Yut, Yesu Kristuyen meten al. Nebe den alya bereya Adoninin Al Kurun belen hoy dirde bubulkunne wor po yen nurd dunen hiyen irde Yesu Kristu belen doyan dirde hiyen mar goke asan gago kan hime.

²Denbe Al Kurun belen buninen dirde, bitin yisikamde, bubulkunne wor po yen nurde dunen hiwon yen gusunan irde hime.

³Be, kadne yago, hanpapyabe Al Kurun belen nen tumnan dumulgan tiyyin goke asan kan dunmewon wor po yen nurde himyen. Goyenbe mere momontin nurdeb mere min hoyan kayen yen nurde gago asan kan hime. Mere gobe gahade: Yesu nin dufay sanin ird ird gobe Al Kurun belen alya bereyamin wawun unkuende po yunyin. Ningeb belen hoyanbe hubu wor po. Goke tenbe Yesu nin dufaytin taren iramin goyen sanin po tanarde hinayin. Monjo al hoyan belen dufaytin bulun yirnayin geb. ⁴Mere ga dinen hime gabe al kura mar belen balmin den hitte wan usi dirde hanjen geb, gago dinen hime. Mel gobe Al Kurun palap ma irde hanjen mar. Irdeb, “Al Kurun belen buninen dirde igin igin dirde hi geb, mata bulunbe igin mali ga ten hitek,” yen hanjen. Irde Doyan Al Kuruninin Yesu Kristube tarenmin kurun wor po gega, pel irde hanjen. Ningeb mel gote mata bulunmin goke bikken Al Kurun belen kame merem yan yiren yirin.

⁵Be, Doyan Al Kurun belen alya bereyamin Israel mar goyen Isip nanjare mat hoyande yukurin gega, yukun hikeyabe al kura dufaymin yen ge sanin ma irkeb gasa yirke kamde pasi hamin goyen denbe kenkela nurde han. Goyenbe goyen goke sopte bebak dirmeke nurnan yenbe gago dinen hime. ⁶Irde Al Kurunyen miyon buda goyen denjem karkuwan yuntin gega, goke ep yen ma nurde Al Kurun asogo irkeb gasunminde mat yakira tike tubul ten hoyande kwamin goke nurnayin. Miyon gobe Al Kurun belen sen taren epte ma tol yetek gore po fere yirde kidoma bulun wor po bana yirtin han.^a Gon po hen kame merem yan yird

^a **1:6** Senya kidomaya yitin gobe megen gake yitin. Miyon yago gobe Al Kurunyen gasunde mat yakira tike megen katamin. Megenbe Al Kurunyen gasun yara mon, mata bulunbe makin hi. Goke tenbe megen gayen ‘kidoma’ yitin gogo.

yird Nalu Kurun goke doyan hen han. ⁷Sodomya Gomoraya taunde nin marya taun binyan goyan nin marya wor mata bulun gwahade goyen po tiyamin. Go mar gobe lelep mata ten hinhan, irde alya bereya ferd ferd mata kura Al Kurun belej bisam yirtin goyen mali mali ten hinhan. Irkeb mata bulunmin gote murungem bulun kurun wor po goyen al belej go kenej kafura henbe gwaha ma ten hinayin yen Al Kurun belej kak huginen hiyen gore kunga yirin.

⁸Ningeb den hitte balmin wayan mar goyen wor mata gwahade go ten hanjen. Go mar gobe mata bulun ten ten nin po mitemitem nurde go po gama irde yingen goyen po Al Kurun dilinde tikin bulun wor po yirde hanjen. Irde Al Kurunyen mere pel irde miyonmin wor mere bulun mat yirde hanjen. ⁹Goyenbe Al Kurunyen miyon gote kurunmin Maikel wor Satan mere bulun mat kura ma iryin. Yenbe Mose hakwam ganun belej tiyyen yen Satanya kadom mohonde tiyaryumya goyen Satan go mere bulun mat kura ma iryin. Gwaha irtinenbe, “Mere bulun taha kurun gakebe Doyan Al Kurun belej gab ginen tiyyen,” inyin. ¹⁰Goyenpoga go mar gobe det kura min kenkela bebak ma ten henyabe mere bulun mat ten hanjen. Yenbe dapna belej mata ten hanjen yara, kenkela ma dufay hen mali ulinde po aman hetek mata go po gama irde hanjen. Mel gobe gwaha ten henbe yingen bulun wor po yirde hanjen. ¹¹Ningeb goke buninen wor po nurd yunen hime. Go mar gobe Kein belej mata bulun tiyyin goyen po gama irde hanjen. Irde Balam belej hora nin ten mata bulun tiyyin gwahade goyen po ten hanjen. Irde Kora belej Al Kurun asogo irde kanduk kinyin gwahade po, mel go wor Al Kurun asogo irde hanjen geb, kanduk kurun kennayin.

¹²Go mar gobe mata bulun tihit yen memyak ma nurde Yesu kamyin goke bebak ten ten ge dula ten hanjende gor mali wan keperde binge nene hanjen. Ningeb mel gore dula mata gote min goyen bulun irde hanjen. Mel gobe yingen ge po nurde hanjen. Mataminbe kigarinjin kura meje belej tawayyen gega kigarin ma katyen go gwahade goyen po, mataminbe iginen minmon. Yenbe he iginen hetek nalure iginen ma hiyyen, irde he go wasen temeyke kamtin hiyen go gwahade goyen po, Al Kurun dilinde huginen ge kamtin hinayin. ¹³Yenbe makan duba huwarke dadilo kawan forok yen hanjen yara mata bulunmin memyak goyen bana ma kunbe kawan forok yirde hanjen. Go mar gobe dinambe kura hughilok yinen hanjen gore beljen wor po goyen tubul ten belej hoyande kunayin go gwahade goyen, dufaymin kenkela ma kipirtin hanjen. Ningeb gwahade mar gokeb Al Kurun belej gasun bulun kidoma wor po goyen bana yermeke gon huginen hinayin yen gitik irtin hi.

¹⁴Be, bikken Adam hitte mat wan wan asi basanmin ⁷Enok belej al gwahade forok yetek goke ten gaha yirin: “Doyan Al Kurun belej miyonmin yago budam wor po goya wan hi go kennan. ¹⁵Yenbe wan megen nin alya bereya kurun gayen igin ma bulun yinen pota yiryen.

Irdeb Al Kurun palap ma irde han mar gore asogo irde mata bulun titin kurun goyen goke merem yan yirde gote murungem bulun wor po yunyen. Irdeb Al Kurun asogo irde mere bulun bulun irde hitin kurun goyen goke merem yan yirde gote murungem bulun wor po yunyen,” yirin. ¹⁶Go mar gobe Al Kurunyen meten goke bearar tenbe ug po ngagak yen hanyen. Mel gobe yingen ge po turun turun ten hanyen, irde yingen ge po nurde al hoyan usi yirde bin yade hanyen.

Dufaytin Yesu nin sanin irde hen hen mata

¹⁷Be, kadne yago, denbe han kapya Yesu Kristuyen mere basan mar aposel belen mata kame forok yenayin goke dinamin goyen bitin sir ma yiyyen. ¹⁸Aposel belen gaha dinamin: “Nalu funan binde hen hikebe tatuwan dirde hinman dirde, dufay bulun Al Kurun belen igin ma nurde hiyen go po gama irde mata ten hitek mar forok yenayin,” yamin. ¹⁹Al gwahade goreb dindiken ulin kadam bulun nurd gunen ten hinayin yen den bana bipti forok irde hanyen. Mel gobe Holi Spiritya ma han geb, ulinde aman hen hende nin mata bulun po gama irde hanyen.

²⁰Goyenbe, kadne yago, denbe Yesu nin dufaytin taren iramin go hende hen hentin igin wor po irde hinayin. Irde Holi Spiritya hen Al Kurun gusunan irde hinayin. ²¹Irde Doyan Al Kurun Yesu Kristu belen bunin dirde Al Kurunya huginen hen hen taren goyen dunyen yen nurde Yesu wan wan nin doyan hen hinayin. Gwaha ten hen yabe Al Kurun belen den goyen bubulkune wor po yen nurd duntek mata igin goyen po ten hinayin. ²²Irde alya bereya Yesu nin dufaymin sanin ma irde dufay budam irde han mar nin bunin nurde yunen hinayin. ²³Irde al kura mata bulun ten kak alare kutek hen han mar goyen yade Yesu hitte yukun hinayin. Irde al kura mata bulun tike goke bunin yirde faran yurde hinayin. Goyenpoga den wor mata bulun goyen tinak geb, kenkela wor po hen ga hinayin. Denbe gwaha ma wor po tinayin!

²⁴Be, Al Kurunbe saninmin kurun wor po geb, faran durke epte ma mata bulunde katnayin. Irdeb Al Kurun denem turun yan wor po hitte dukuke dilin mar huwarnayin. Irde denbe mata buluntin minmon geb, kanduknen ma nurde amanen wor po nurde hinayin. ²⁵Yen unkuken po gab Al Kurun. Irde Yesu Kristu belen meten titin go hende nen gayen mata bulunde mat dumulgan tiyyin. Ningeb yen po denem turun yan irde hitek. Yenbe Doyan Al Kurun wor po, tarenmin wor kurun wor po. Irde megenya nan kinya det kurun gate doyan al wor po. Biken wor gwahade po hinhin, han ka manan hi, irde kame wor gwahade po hiyen. Fudinde wor po.